

Kiristoos Yisa Tarjamonnante

Kinin Yittsaa Bhawloos

Pilbhisoos Eenana

Kinin Thaapoono Warqanno

Ardinta

Pilbhisoos katamano Moqodoonia peente ko da-hade. Kedi Roome eedi yinin dohonna, “Roome peen yiggino woam toolasane” hamayse keda odime. Pee waana waanara nivayna nagganna kataman ogoka keda sage.

Bhawloos Thirovaddar dahayse Barjokala shedintoka Moqodoonia eedi kalaa “Wokal nivayse woam kelshaa!” hamayse kinin giyena haapayse, ogona “Barjo ogodar wonin yivoadettsi eelidine” hamayse Pilbhisoos katamandar ki yivade (Yi Waa 16:9-10). Sillaasbee, Thimaatoosbee, Luqaasbesana Pilbhisoos yeskayse ukunsen rooroaka Ayiwed eena miskana bayn gasante kenin buken raqinte waani waani maanana Barjosa dhacchintan upsinam ke tarjade.

Liidiabee kosa oonin eenabe Barjodar woy-lamin ke qajade. Pilbhisoos misken ooninsa woysadhidino kennon goynkane (Yi Waa 16:13-15). Budobar Bhawloos beeronam waadima eedi kallorra kinin bulenka, kosa imbanha Bhawloos-bee Sillaasbeam yedayse kataman wottsaynasa birante bersayse dhaxin ooninte ke dhaskade (Yi Waa 16:19-24). Barjo peenin zigimoadettsi kinin

haysonna, dhaxin ooninam toolea ea Barjosa kantanam haapayse kidar woylamin ki qajade (Yi Waa 16:25-34). Ogoraar Bhawloosbe dhaxira ke buldhade.

Thoothi levesa budonte Bhawloos Roome kata-mante dhaxadhadhayse kaa warqataam 52-54 levensa iinte ki thaapade. Ogotear buuda beerimeka ki dhaxadhaakaar, gebhi wozaka Pilbhisoosir dahaana Barjodar woylamin qajaanana Barjosa dhacchintan upsinam thoothi giyada kena ki thaapade.

Kaa mathaapaam raq saldar kashana dandima ko dandime:

1. Nagaymakkono (1:1-2)
2. Barjodar woylamin qajaanasa Bhawloosin thettsoono gobshinbee miskenbe (1:3-11)
3. Bhawloosbee kisa dayntanbesa (1:12-26)
4. Barjodar woylamin qajaana hamin daa keam zaskayno (1:27-30)
5. Kiristoossa bhocchinbee kamsinbe (2:1-18)
6. Thimaatoosbee Ebhapirooditosbe Barjodar woylamin qajaanana kenin qaaboono (2:19-30)
7. Bhawloosbee kisa kamsinbe (3:1-21)
8. Bhawloossa gobshinbee kiilimenbe (4:1-20)
9. Macchin nagaymakkono (4:21-23)

¹ Yesus Kiristoossa waadima eedi maataana i Bhawloosbee Thimaatoosbekalanka Pilbhisoos katamante dahayna Yesus Kiristooska gaza maataana wulna, pir misken ooninsa donzanabee waani waadiman eenabena nittsadhoono warqannone.

² Wosa Imbaa Barjobee Imbaa wontea Yesus Kiristoosbesa sunin imintonbee payyamonbe yena ko dee.

Bhawloos Barjoam Kinin Gobshoono

³ Ye am inin bhocchen wodan wulka isa Barjoam ida gobshe.

⁴ Ye wulna Barjoam inin misken wodan wulka, rooro wul wozaka ida miske.

⁵ Biraa rooroara yedayse kinaka yekka Barjosa dhacchintan upsinam inin giyenka imbesana waadadhaana yenin maatonna Barjoam ida gobshe.

⁶ Yesus Kiristoosin nivea rooroaka yekka payyan waadimanam yesa iinte yedaa Barjoyn yeskisenam gon inta dhesidine.

⁷ Ye wulna ogodettsi qaaba iam koda zaske. Ogonoar isa dhaxinka ko hanna, Barjosa dhacchintan upsinam gon konin dohonam keedhadhenbee ogoamaar wocchinsadhenbeka ko hanna, Barjosa sunin imintonka yedi wulatte kashimayna yenin dohonna, yedi rooro wul isa woylaminte ye dahade.

⁸ Yesus Kiristoossa nashimmakkonka yedi wul hamaddha ikal yenin bhoqensa Barjo isa tarjane.

⁹ Yesa nashimmakkono dhesintobee bhocchibeka thoothoono maatayse gebhaate konin yivoadettsi yena Barjoam ida miske.

¹⁰ Ogonoar kattsi payya maaten yerinam marmarayse yenin dhesoadettsibee Kiristoos maatate kinin nivea rooroaka gazanabee siyamo yindar qolminabe maatayse yenin haapadhoodettsine.

11 Ogodettsin dayntan yennonka Yesus Kiristooskala haapadhen tipa waadimaka thoothaana maatayse Barjona gobshi hapsayna yeda maate.

*Bhawlooossa Dhaxino Barjosa Waadimanam
Konin Workisoono*

12 Imbanaanato, ogono idar yeskoono yerro Barjosa dhacchintan upsino kattsi konin workoadettsi konin hayenam yenin dhesoadettsi ida nashe.

13 Inin dhaxadhoono Kiristoos goynka konin dohonam hayonasa oonin toolaynabee waani een wulbe dhesidine.

14 Inin dhaxadhon goynka Barjodar woylamin qajayna thoothina Barjosa upsinam kurtumb-hima giyana Imba wontea Yesuska kedi sagi kanta haapidine.

15 Waani waani Kiristoossa tarjen upsinam kenin giyayno woogintabee palimebekane; waani pir payyamon qaabenka keda giye.

16 Igina Barjosa dhacchintan upsinna inin palimoadettsi inin kambhonam yinin dhesenna, nashimmakkoka ogoam keda haye.

17 Igina waani Yesus Kiristoossa tarjayna lemmakkoka dayma, meten yinnonam gettsota isa dhaxindar gaale ab idar bovota qaabaysene.

18 Ogona dhari maataamaka ko dahaakaar, gonka ko dahaakaar, goyi wulka, Kiristoossa tarja ko tarjadhe. Ogokaar wozadhadaya wozadhe; os birantear wozadhadaya wozadhe.

19 Ogonoar yesa miskenbee Yesus Kiristoossa Manpasin kelshonbeka ko gaalera inin dhaqenam inin dhesennane.

20 Rooro wul inin hayendettsi kinaar sadaka i dahaakaar way i diyaakaar, Kiristoos i kaa waan qaadhaaka gobshadhasane hamayse kur-tumbhima may ida giye. Pir yer hamin daaad goytika ooshimbhayse inin haapadhoamadettsi gebhi anngarmaka qaabe hayte i dahade.

21 Harrna hambhidianna, ina sadaka daa haminta Kiristooska daynta hamintane; diynta haminta yer payya haapintane.

22 Ko dahaakaar ko waanka dehea i hanna, aapi imea waadima ida waadadhe. Dahayse dayntabee dembhibesa hamaam kama iam konin zaskenam dhesattine.

23 Igina lamaana qaabonaka inta gaalidine. Kiristoosbesana dayntano yer wuldara konin sagenna, diyayse kimbesana kinka daana ida anngardhe.

24 Ko dahaannaar sadaka isa daano yena kattsi zaskaynone.

25 Ogoam inin dhesonna dembhira dhaqayse yesa Barjodar woylamin qajidino konin gebhoad-etsibee woza yenin haapoadettsibe ye wulbesana inin kappenan dhesayda dhese.

26 Inta pir yekal maataate inin nivenka, inka yesa dohoono pormakkono Yesus Kiristooska koda thoothe.

27 Keeda yer wuldara sagi maatayno dayntano yesa Kiristoossa dhacchintan upsinam gobshayno ko dee. Ogonoar inta nivayse yeam inin shedenka, way yekalanka i pegadhaakaar bhocchi kalaaka wocchimbhayse yenin woyenbee kinka Barjosa dhacchintan upsinam yeskisana yenin mashimenbeam ida qanse.

²⁸ Yembesana palimaynaam hamin hambhaakaar kurtumbheebhode; ogono yesa wocchimbheno kena kayesa milkit konin maatenka, yena dhaqintasa milkitne; yenin dhaqaynoar Barjosa kantankane.

²⁹ Kiristoosna waadadhana baali yena imbhooно kidar woylamin ye qaje bish dayma, tapir kinnon goynka gaale ye tiyene.

³⁰ Ogon gaalen mashimeno ena birayse idar ko yeskaysaka yedi haapidine; taar yeskaate konin dohonam yedi qansaate ye dahade. Ogonante taaki imbesana gaalite mashimayna ye maatade.

2

Kiristoossa Payyan Qaabonsa Kamsino

¹ Kiristooska yesa wocchimbhe daa ko hanna, kisa nashimmakkonkaar wocchimbhaana ye hanna, Manpas Gazankaar kinka kalaa maataana ye hanna, kinka kinka kinaar burqadhaynabee payya yer hayaynabe ye hanna,

² nashimmakko kalaabee, woylam kalaabee, qaabo kalaabeka maatayse kinka kinka agintaka, isa wozanam thoosee.

³ Metenam toskayse waani eenaam yedara kattsi sagi kenin dohonam bhocchee; meten yennonam gettsayse way “Idara sagea hayne?” hamayse pormakkoka yer kala hattear hayebhode.

⁴ Yin yedi kalaa kalaana yena agen bish dayma, eedi abnaar agenam bhocchee.

⁵ Yesus Kiristoosdar dohoono qaabono yedadar ko dee.

⁶ Kidi Barjo dantanka dahayse

Barjobesana kiaddha maasenam yina yedana
bhocchadehe.

⁷ Ogona yisa dohon gobshinam garayse
eedina waadima eedi dantanam tiyayse ki haapadhad;

peen kodar eedidettsi maatayse ki dahade.

⁸ Meten yinnonam toskayse
dembhi ko hannaar, diyota Barjona ee hamaa ki
maataade;

ogonoar masqalindar konngadhayse
ziitadhidinkane.

⁹ Ogonante Barjo kiam kattsi dheg ki hayade;
naabe wulsa bhaabar hama naabe kina ki imade.

¹⁰ Ogona Yesussa naabenam gobshintaka
cecinbee, peenbee, peensa choobarbe daahaana
wul

buqon yinnonka kenin kumpurdhoodettsine;

¹¹ yisa aponkaar
“Jesus Kiristoos Imbane” hamayse kenin tarjoadettsine.

Yin hayntaka Barjo Imbaam keda gobshe.

Peendar Dohon Eenna Shaaka Maatinta

¹² Ogonante isa nashonato, inta yembesana
inin dohon wodan wulka ina ee hamayna yenin
dohondettsi, ta yekala pegadhayse inin dohon
wodanka sagi ee hamayna yenin doadettsi ida
bhocchise. Ogodettsi yedi kalaa kalaana yenin
dhaqonam may hayana kurtumbhebee gibazabeka
wocchimbhayse waadadhee.

¹³ Harrna hambhidianna, Barjo yisa payyan
bhocchinam yenin zagoabee hayoabedettsi yesa
iinte hayea Barjone.

14 Waadima hamaamaar yenin waadadhenka gundumimabee palimimabe waadadhee.

15 Yin hayayna ye hanna, ko wodan een wobonbee siyonbesa shaarinte wuupobee siyamobeysa qolmina Barjosa gazana naana maatintaka, peen kodar wancodettsi shaakayna maatayse yeda haapadhe.

16 Ogono yin konin maatayno, sadan imen upsinam kena garma yenin giyenkane. Ogodettsi isa gobenbee isa waadimanbe sun pootima maatayse konin shidhiminna, Kiristoos nivea rooroaka kanka inin erimea isa yer daane hamintane.

17 Yesa Barjodar woylamin qajidinbee waadimanbe Barjona marsha machadheadettsine; pir i deesadhidiannaar isa zombhino marshandar laldhea wucimadettsi konin maatenna, ida wozadhe; isa wozanamaar yembesana ida kashime.

18 Ogodettsi yedi wozadhee; yesa wozanamaar imbesana kashimee.

Thimaatoosbee *Ebhapirooditosbesa*
Waadimano

19 Intaar yennon goynsa qansayse inin wochimbhoadettsi, Imbaa wontea Yesussa bhocchi maatidi ko hanna, Thimaatoosam saana yedar yittsana qaabe ida haye.

20 Yesa dayntan goynsa idettsi woylem wulka bhocchea eedi ab qolehe.

21 Waani eena wul yina maaten yerinam keda zage; Jesus Kiristoosna maaten waadimanam qaabehe.

22 Thimaatoos taysate shedadhenkaar gon hama eedi kinin dohon, pir naasibee imbabe

kinka kenin waadadhendettsi, kidi imbesana kinka Barjosa dhacchintan upsinam giyaate kinin waadadhonam yedi dheseeda dhese.

²³ Ta keeda inno yerro hardar konin yeskonam inin qansonsa budonte Thimaatoosam saana yedar yittsana bhocchi ida haye.

²⁴ Taar inta imal yekal saana inin nivoadettsi Imbaa wontea Jesus haya ki haye ida hame.

²⁵ Ko daahaannaar iam kinin kelshoadettsi yenin yittsaa Ebhapirooditos, isa imbanaas maataabee imbesana kinka Kiristoosna banqin kanseabeam yekal maasate yittsa ko iam zaske hamayse inta bhocchidine.

²⁶ Yedar kiam yittsana inin zagoono yeam shedana kinin angardhonnabee yedi pir kisa hajadhidinam yenin qanson goynka kidi kattsi kinin qaabonnabene.

²⁷ Kidi gon hajadhayse diyana yeskidine. Ko daahaannaar Barjo kina burqadhayse kiam ki pacchade; kibisheana dayma, pir ogo galshen qaabondar qaabe ab idar yeskoamadettsi ki hayade.

²⁸ Ogonante kiam pir yenin shedenka yenin wozadhoodettsibee isa qaabon tokoadettsibe yedar kiam yittsana kattsi i zagade.

²⁹ Keeda gebhi wozadhaate Imbaa wontea Jesus goynna hamayse kiam tiyee; kidettsi daahaana eenaamaar gobshee.

³⁰ Harrna hambhidianna, yedi ikal nivayse iam kelshana yenin damaamonam kidi waadadhota sadan yinnonam anngardhima Kiristoossa waadimanna hamayse dembhina ki yeskisade.

3*Gonin Hammo Tipamono*

¹ Macchindar, imbanaanato, Imbaa wontea Yesuska wozadhee. Kosa birayse yena inin thaaponam tapir yena thaapanam iam tottsehe; pir yeam dhaddhiserra toolana damasane.

² Qaskidettsi maataana, siyon hayayna, zaskaama goytika eensa bishinam taxayna eenakalanka mete yesaam gishee.

³ Wodi Barjosa Manpasinka goodimayna, wosa waandar keedhimayse dayma, Yesus Kiristooska erimayna wonin dohonna, gonin hamon qamanam taxadhaana wodine.

⁴ Intaar waandar inin keedhimayno yer isa daane; waani eneo waan yinnondar konin keedhimea yer kona maataakaar inta kodara sagayda sage.

⁵ I adhadhaysaka lankaysoa rooroaka isa qamanam ko taxadhade; inta Biiniam muldhara dhaa Israveel eedine; pir gon hama Ibra eedine.* Muse yigginam toldhen goyn ko hannaar, inta Parisa eedine.

⁶ Barjo goynka woogimbhea i hanna, Yesusdar woylamin qajaynaam ida oyte; Muse yigginam toolintaka haapadhayno tipamon goynka ko daana, inta siyamoysa qolma eedine.

⁷ Ko dahaannaar kosa birayse ina pootayna yerra wulam Kiristoosna hamayse pootimadettsi hayayse i paydade.

⁸ Ogora sagi isa Imbaa Yesus Kiristoosam dhesintano yer wuldara kattsi konin sagenna,

* ^{3:5} “Gon hama Ibra ea” haminta Israveel eensa gilon wulam tooleane hamintane.

waani yerin wulam pootima yerdettsi koam ida payde. Kina hamayse yer wulam i kaysade; Kiristoosam haapanan yer wulam hargedettsi ida payde.

⁹ Ogoam inin hayaynoar Muse yigginam toolintaka inin haapen tipamonam dayma, Kiristoosdar woylamin qajintaka haapadhen tipamonam haapayse Kiristoosbesana kala maatanane. Tipamon ogoam Barjo kidar woylamin qajayna eenana kida ime.

¹⁰ Kiristoosbee kisa dembhira dhaabhidinsa kantanbeam dhesana, kisa gaalenkaar kimbesana kinka kashimanabee kisa dembhinkaar kidettsi maatanabe ida zage.

¹¹ Ogona inta diyaanayn dembhira dhaabhendar inin yeskoadettsine.

Macchindar Yeskana Gobinta

¹² “Ko wulam inta haapidine” way “Ogo wulka gonin ea i maatade” hamattine. Ko dahaannaar Yesus Kiristoos iam yinti eedi hayayse kinin bhochonam yedana os birandar ida gobe.

¹³⁻¹⁴ Imbanaanato, inta akar ogodar yeskidine hamayse paydattine. Ko dahaannaar yer kala ida haye: Isa budonte dohonam walaate, isa birante dohon bazanam tiyana wocchimbhayse ida gobe. Ogoni inin tiyayno bazano Barjo Yesus Kiristooska tura cecindar eelayse ina kinin imayno gonin hamon sadanone.

¹⁵ Keeda Kiristooska gebhaana wodi wul koam wo bhoccche. Yer ab bhocchayna ye hanna, Barjo ogoamaar yena may hayasane.

¹⁶ Yin ko dahaakaar ta wonin yeskon dayntanka kiaddha maatoonno wosa dayntano ko dee.

¹⁷ Imbanaanato, inin hayendettsi hayayna eena maatee; wosa kamsinka yivayna wulam payya hayayse shedee.

¹⁸ Harrna hambhidianna, kosa birayse thoothi woda yena inin giyaadettsibee ta ermitka eepite yena inin giyendettsibe, thoothino eeno yisa yivintanka Kiristoos masqalinsa banqi eed ko maatade.

¹⁹ Kesa macchino kayene; kesa barjoa iine; kesa gobshino ooshimbhekane; kesa qaabono peen yerindarne.

²⁰ Wonno peeno ko hanna cecintene. Ogora nivea woam Dhacchea Imbaa wontea Yesus Kiristoosam anngarmaka woda toole.

²¹ Kidi yer wulam yisa hayamon demente hayana damisen kantaka ooshimbhe yindar dohon wosa bishinam ookayse, yisa gobshinsa bishi konin maatoadettsi kida haye.

4

Macchino Kiilimeno

¹ Keeda inin nashaynabee kattsi inin bhocchaynabe imbanaanato, pir ininka wozadhaynabee isa waadimansa aapi maataanabe, yedi Imbaa wontea Yesuska wocchimbhayse woyee.

² Ewodiabee Sinthikibe kinka kinka Imbaa wontea Yesuska agayse kenin doadettsi keam ida miske.

³ Yaar gonin ea, imbesana kinka waadadhea imbanaasa, igma maanaam hanin kelshoadettsi ida miske. Kedi imbesana waadadhaana Qeleminthoosbee waani eenabesana kinka maatayse Barjosa dhacchintan upsinam

eenna yeskisana kedi mashimidine. Ke wulsa naabenaam dayntan mathaapinte thaapadhidine.

⁴ Roro wul Imbaa wontea Yesuska wozadhee. Pir yena ida giye: Wozadhee!

⁵ Yesa lemmakkonam rooro wul eedi wulna dhehee. Imbaa wontea Yesussa maataate nivano saanidine.

⁶ Yer wulka Barjoam gobshika miskaate yesa oysimenam kina dhettsisee. Yer kalaaka hattear qaabite gaaleebhode.

⁷ Eedisa bhocchi wulra sagi maatoono Barjosa payyamono yesa woylaminbee yesa qaabonbeam Yesus Kiristooska koda toole.

⁸ Macchinte, imbanaanato, gonbee, gobshibee, tipabee, gazabee, nashadheabee, shawkadheabeam bhocchee; kattsi payya way gobshadhayno ko hanna, igina wulam maasite maasite bhocchee.

⁹ Ikala yenin timmironbee yenin tiyonbe, ogonoar inin giyenka yenin qansonbee inin hayenka yenin haaponbeam hayee. Payyamon Barjoa yembesana kida dee.

Bhawloos Kina Nittsadhon Imintonna Kinin Gobshoono

¹⁰ Thoothi wodansa budonte tapir isa gaalen goynka yenin bhocchonna, Imbaa wontea Yesuska kattsi ida wozadhe. Ta koka yekka yenin qaabonam waadimaka dhaana goyti payya haapeetene; isa gaalenna qaabite ye dahade.

¹¹ Pir ogoam inin giyayno isa dayntanna zaskayno qolmakatehe. Harrna hambhidianna, “Isa dayntano ina yeka ko yeeke” hambhenam inta timmiridine.

12 Bashadhintanam ko dahaannaar, thoothika haapintanam ko dahaannaar, dhesayda dhese. Raq hamote ko hannaar, hamaa wodakaar mishintabee, daaqardhintabee, haapintabee, kaysintabeam inta dhesidine.

13 Kantanam ima imea Kiristooska yer wulam damayda dame.

14 Ko dahaannaar isa gaalenam imbesana kinka kashimayna yenin maatonna, payya ye hayade.

15 Ogonoar Barjosa dhacchintan upsinam yesa shaarinte giyan inin yedenka, Moqodoonia peera inin uten wodanka, ye Pilbhisos gidir dahaana eena yesa misken oonira ab ina koymon imintakabee tiyntakabe iam kelshaa misken ooni qolmonam yedi dheseeda dhese.

16 Teselonqe katamante inin dohonka, ina zaskenam lamaa goyt yedi nittsidine.

17 Yesa imintonam anngardhayse dayma, yesa imintonsa aapino kalon yena konin thoothoадетси anngardhayse ida giye.

18 Iam zaskenbee iam zaskenbesa bhaabar hamon ina yenin yittson imintonam Ebhapirooditoshkalanka inta tiydine. Ogoro imintono Barjoyn tiyayse kanka wozadhen payya gaamen shittonka thoothon marshandettsine.

19 Isa Barjoa yisa gobshinka dohon thoothin wodimmakkorra Yesus Kiristooska yena zasken wulam kida ime.

20 Wosa Imbaa Barjona rooro wul lay gobshi kina ko dee; amiin.

²¹ Yesus Kiristooska dahaana gazana een
wulna “Nagaya” hamee. Imbesana kinka
dahaana imbanaana yena “Nagaya” keda hame.

²² Gazana een walbee kattsika Roome peen
bitaasa waadiman eenabe yena “Nagaya” keda
hame.

²³ Imbaa wontea Yesus Kiristoossa sunin im-
intono yembesana ko dee.

Haalin Mallano

The New Testament in the Banna language of Ethiopia

copyright © 2014 SIM International

Language: Banna (Hamer-Banna)

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-15

PDF generated using Haiola and XeLaTeX on 18 Apr 2025 from source files
dated 13 Dec 2023

c016ad2a-86fa-56e3-93a0-340e8e22d603